

МЕСЯЦА ФЕВРАЛЯ В 3-Й ДЕНЬ.

СВЯТАГО И ПРАВЕДНАГО СИМЕОНА БОГОПРИИМЦА И АННЫ ПРОРОЧИЦЫ

На Господи, воззвах: стихиры праздника, 3 и святого, 3.

Стихиры праздника, глас 1.

Подобен: Небесных чинов:

Творец всяческих и Избавитель наш * Материю Девую в церковь приносится, * темже старец, Сего прием, * с радостию зываше: * ныне отпускаеши раба Твоего, Блаже, с миром, * якоже изволил еси.

Симеон, на руки от Девы прием * прежде всех век рожденного * Спаса видех, вопияше: * просвещение Твоя славы концем; * ныне отпускаеши раба Твоего, Блаже, с миром, * яко видех Тя днесь.

Напоследок веков рождена на спасение человеков, * Симеон, понесый на руках Спаса, * радуясь, вопияше: * видех Свет языков и славу Израиля, * ныне отпускаеши, якоже рекл еси, яко Бог, * от сущих zde велением Твоим.

Ины стихиры святого, глас 4.

Подобен: Дал еси знамение:

Праведен и совершен * и по всему славен сый, Богодохновенне, * Бога Единого совершенна, * во еже оправдати мир пришедшаго, * подъял еси руками воплощенна, * и отрешитися телесе, вопия Ему: * ныне отпускаеши раба Твоего * с миром, Человеколюбче, * яко видех Тя днесь.

Юношствуя духом, * престарев же телом, Симеоне, * обещание приял еси не видети смерти, * дондеже увидиши Младенца юна, * прежде век Сущаго Творца и Бога всяческих, * плотию обнищавша, * видеv же, выиграл еси * и плоти разрешение просил еси, * к Божественным селением прешед, радуясь.

Анна Богодохновенная * и Симеон пребогатый, * пророчеством сияющий, * в законе же непорочни явльшиися, * закона Дателя, * Младенца, явльшася по нам видеvше, * Тому ныне поклонишася. * Тех память днесь радостно празднуим, * по долгу славяще Иисуса Человеколюбца.

Слава и ныне, глас 5.

Германово: **В**етхий деньми, младенствовав плотию, * Материю Девую в церковь приносится, * Своего закона исполняя обещание, * Егоже Симеон прием, глаголаше: * ныне отпускаеши с миром, * по глаголу Твоему, раба Твоего, * видеvша бо очи мои спасение Твое, Святей.

На стиховне стихиры, глас 1.

Подобен: Небесных чинов:

Богоявления неизреченнаго * ныне празднуем спасительную благодать: * от Девы бо Отроковицы непреложно младенствовав, Христос Бог * в церковь Богу и Отцу * Материю ныне приносится, * Егоже прием, Симеон руками объят.

Стих: **Н**ыне отпускаеши раба Твоего, Владыко, * по глаголу Твоему, с миром.

Во пророцех виден был еси, якоже мощно бяше, Иисусе, * Тебе видети древле, * но ныне, Божий Слове, * плотию всему миру явился еси волею от Девы Марии, Христе, * Твое спасение всем сущим от Адама явил еси, * яко Человеколюбец.

Стих: Свет во откровение языков * и славу людей Твоих Израиля.

На Синайстей горе закон учинивый древле, * ныне в Сионе граде исполняя законная, * руками Богородицы * Младенец, Христе, со всеожжении * на руках Симеона * во храм внесися восхотел еси плотию.

Слава, и ныне, глас 1:

Иоанна монаха: Днесь древле Моисею в Синаи закон подавый * законным повинуется велением, * нас ради, яко Милосерд, по нам быв. * Ныне Чистый Бог яко Отроча Свято, * ложесна разверз чистыя, * Себе Самому яко Бог приносится, * законныя клятвы свобождая * и просвещая души наша.

Тропарь праздника, глас 1:

Радуйся, Благодатная Богородице Дево, * из Тебе бо возсия Солнце Правды, Христос, Бог наш, * просвещаяй сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение.

НА УТРЕНИ

На Бог Господь: Тропарь праздника, глас 1:

Радуйся, Благодатная Богородице Дево, * из Тебе бо возсия Солнце Правды, Христос, Бог наш, * просвещающий сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение. [Трижды.]

По 1-й стихологии седален, глас 1.

Подобен: Камени запечатану:

В церковь принесся еси, Жизнь всяческих, * мене ради младенствовав, * под законом был еси, * древле начертав на скрижалех закон на горе Синайстей, * да вся измениши от законных древних работы. * Слава Благоутробию Твоему, Спасе, * слава Царствию Твоему, * слава смотрению Твоему, * Едине Человеколюбче.

Слава, и ныне, тойже.

По 2-й стихологии седален, глас 5.

Подобен: Собезначальное Слово:

Во храм принесся еси, обычная исполняя, * Творец, и Владыка, и закона Датель, Спасе, * и на руках Симеона благоволением Твоим носитися плотию, * Иже всем страшный и всю тварь содержи, * восхотел еси, Едине Щедре, * свет Твой всем открыти нам.

Слава, и ныне, тойже.

Канон праздника со ирмосом на 6 (*зри в сам день праздника*) и ин канон святого на 6, егоже краегранесие: Приими пение, Симеоне Богоприимче. Иосиф. Глас 4.

Песнь 1

Ирмос: Отверзу уста моя, * и наполнятся Духа, * и слово отрыгну Царице Матери, * и явлюся, светло торжествуя, * и воспою, радуяся, Тоя чудеса.

В праведных селениях радостно водворяясь Праведнаго Господа, Симеоне праведный, иже Божественное твое совершающая преставление оправдати моли, преблаженне.

В законе быв священнодатель, священнейше, Егоже закон проповеда, Младенца видел еси и естества законом, Богоприимче, умер, к бессмертной, радуяся, прешел еси жизни.

Руками держащаго вселенныя концы, Девическими носима руками, видел еси и, честными твоими прием объятии, Моисея вышший явился еси, пребогате.

Богородичен: Полный истощается, Превечный начинается, Слово одебелевает, Содетель зиждется, Невместимый вмещается, во чреве Твоем воплощаемь, Богоблагодатная.

Песнь 3

Ирмос: Яко неплоды, роди от язык Церковь, * и многое в чадех изнеможе сонмище, * чудному Богу нашему возопиим: * Свят еси, Господи.

Возвысився деяньми священными, Богоглаголиве, яко световиден столп высок, Всесвятому Духу был еси, утверждаяся яве, темже восхваляем тя.

Закону Господа, разверзшаго ложесна Девича, и Младенца, плотоносна, Симеоне, бывша, видел еси, дарующаго всем избавление.

Руками человека создавый, воплощься, руками твоими держим есть, освящая тыяве, и к жизни будущей просившася, блаженне, отпускает тыя.

Богородичен: Мысленную Ты клещу, угль носящу Божественный, от Твоих кровей воплощенна паче ума Симеон яко виде, Всенепорочная, радуяся, ублажаше.

Кондак святого Симеона, глас 4.

Подобен: Явился еси днесь:

Старец днесь отрешитися от юз моляшеся * сего жития тленного, * Христа восприят на руки, * Зиждителя и Господа.

Седален, глас 3.

Подобен: Красоте:

От Девы Ты воплощенна, Христе, радуяся, подъят священный Симеон,— * ныне отпускаеши,— вопия,— раба Твоего, Владыко. * Анна же непорочная, пророчица и славная, * ныне исповедание и пение приносит Тебе. * Мы же, Жизнодавче, вопием Ти: * слава тако благоволившему.

Слава, и ныне, тойже.

Песнь 4

Ирмос: Седяй в славе на престоле Божества * во облаце легце, * прииде Иисус Пребожественный * Нетленною Дланию и спасе зовущия: * слава, Христе, силе Твоей.

Престарелся еси в старости, верою же обновился еси, нова Младенца хотя видети, Симеоне, всесовершенного, обновляюща мир обетшавший прилогом ветхаго борца.

Ублажим согласно Симеона блаженнаго, яко сподобльшася видети Бога Блаженнаго, в плоть оболкшася, яко да сотворит блаженны, окаянны прежде бывшия.

Законодавца Ты вем и законных естества воплощашася кроме, закон же нов введшаго, Симеон взываше, Едине Господи, ныне отпусти мя к жизни нетленней.

Богородичен: Иже рукою вся носяй, на руках носимый Приснодевы, Сию Херувим содела и Серафим вышшу, яко родительницу, Юже воспоим и благочестно ублажим.

Песнь 5

Ирмос: Ужасошася всяческая * о Божественней славе Твоей: * Ты бо, неискусобрачная Дево, * имела еси во утробе над всеми Бога * и родила еси Безлетнаго Сына, * всем воспевающим Ты * мир подавающая.

Ума чистотою Богу Вседержителю, яко Ангел послужив, блаженне, кровными жертвами очистил еси древле люди Израилевы, кровь спасительную предзнаменовав ясно.

Самого себе сотворил еси храм Богу всевят дела Божественными, Богоглаголиве. Темже яко Младенца во святем храме видел еси Бога с плотию, тыя преставающа к Божественным селением.

Воспоим днесь, духовно ликующе, вси Симеона Богоприимца и с ним Анну целомудрую, пророки суца Божия и Сего видевшия, нас ради младенствовавшего.

Богородичен: Не опалив ложесн Твоих естеством Неизменный, Едина Херувим святейши, Человек явися, из Тебе раждаемь, и отриновенныя тлением вся совокуши, Богомати, Рождеством Твоим.

Песнь 6

Ирмос: Возопи, прообразуя погребение тридневное, * пророк Иона, в ките моляся: * от тли избави мя, * Иисусе, Царю сил.

Возопил еси, внегда видел еси Господа, Симеоне, яко обещался еси: ныне раба Твоего, Спасе, отпусти, во аде сущим всем Твое Божественное возвещающа воплощение.

Украсился еси и Моисея светлейший был еси, на руки добротою Краснаго приим, Симеоне старче, нас ради по нам Младенца бывша.

Вод тя исполнена Божественных суща и во адова дольная места спешша, видевши тамо сущии узницы, Симеоне, Божественныя росы исполнишася.

Богородичен: Уловити мя всегда ищет вселукавый, но того мя сетей исхити, Владычице, и Божественным кровом крил Твоих цела соблюди.

Кондак и икос праздника.

Песнь 7

Ирмос: Не послужиша твари Богомудрии, * паче Создавшаго, * но, огненное прещение мужески поправше, * радовахуся, поюще: * препетый отцев Господь и Бог, благословен еси.

Законно Господу Вседержителю ты послужил еси, праведен яко истинно и в законе непорочен, блаженне, быв, темже поеши: препетый отцев Господь и Бог, благословен еси.

Радость скорбящих прииде, избавление Израилю воистинну явися, яко Младенец в храме своем, отпусти мя к жизни будущей, Симеон вопияше, радуясь.

За милосердие щедрот Твоих претруждена мя закона писменем, слячена мя старостию отпусти, Спасе, раба Твоего, яко видех Тя, Симеон взываше, на земли носяща плоть.

Богородичен: Не истощив полный пречистых недр рождашаго Отца, в Твоих недрах, Чистая, яко Младенец седит, уготовая, имже восхоте уподобиться, Пречистая, священное яве седалище

Песнь 8

Ирмос: Отроки благочестивыя в печи * Рождество Богородичо спасло есть; * тогда убо образуемое, * ныне же действующее, * вселенную всю воздвизает пети Тебе: * Господа пойте дела * и превозносите Его во вся веки.

Овдовевший мир Божественныя славы пришедшаго невестоукрасити Пребожественнаго, вдова сущи, Анна всехвальная, и пророчества благодатию облистаемая, прослави Его и будущее всем предстоящим покаже Божественное избавление.

Законныя жертвы приносил еси Агнца за милосердие несказанное, кровь спасительную провозвещая издалеча, блаженне священниче, Егоже воплощенна прием, Симеоне, прославился еси паче Моисея и всех пророков.

Видев Желаетаго, разрешение приял еси телесное, Богодохновенне и, якоже зрелая пшеница, прешел еси ко отцем, славне, воспитан в старости добрей. Темже твою всепразднетвенную память радостию душевною совершаем.

Богородичен: Яко крин, яко благовонен шипок, яко Божественное обоняние, обрет Тя Слово Пребожественное, Пречистая Богоневесто, и в Твою утробу вселися, благоухая наше естество, злосмрадия испольшеся, еже от греха, Марие Богородице.

Песнь 9

Ирмос: Ева убо недугом преслушания клятву вселила есть; * Ты же, Дево Богородице, * прозябением чревоношения * миру благословение процвела еси. * Тем Тя вси величаем.

Честны руце твои, воистинну прикоснувшияся, Богоприимче, Божественным удесем, прикасающагося горам, якоже поет Давид, и дымятся: блажен воистинну ты был еси. Темже достойно восхваляем тя.

Рака твоя источает верным исцеления, память же блаженная, сияющи паче солнца, и всех души просвещающи, и мрака мысленнаго исхищающи, священнотаинниче всечестне.

Просвещают сиянием мысленным, яко солнце и луна подсолнечную, Анна целомудренная и пророчица, старец же Симеон славный. Ихже ради нас, Человеколюбче Господи, греховныя тьмы избави.

Богородичен: Явльшуюся Тя, Матерь Божию, яко видев, Богородице, старец рече, якоже пророк: се Твой Сын, на востание и падение многих лежит, Владычице, и в знамение неудобосказуемое.

Светилен.

Подобен: Жены, услышите:

Непременно по Ипостаси в Тебе, Богородительнице, * плотию соединися безсеменно * и младенствова Слово, Егоже на руках носящи, Херувимски, яко престол, * ныне Богу Отцу принесла еси, * и Симеон старец, радуясь, прият Того.

Слава, и ныне, праздника.

На стиховне стихиры, глас 6.

Подобен: Тридневен:

Восприими, рече, Симеоне, Зиждителя всяческих руками: * о старче, подыми Христа, * Егоже Дева Отроковица роди без семени * на радость роду нашему.

Стих: Ныне отпускаеши раба Твоего, Владыко, * по глаголу Твоему, с миром.

Закону Творца и Бога, * Егоже трепещут Ангельская множества, * сопешдшеся, воспойм, людие, Единого Благодетеля и закону Законодателя * во спасение душ наших.

Стих: Свет во откровение языков * и славу людей Твоих Израйля.

Ныне отпускаеши, Владыко, раба Твоего, * якоже рекл еси, с миром, * яко видех Тя, Христе, Света Первовечнаго, * союз мя плотских, * во откровение языков и Израйлю.

Слава, и ныне, глас 2:

Священнаго Священная Дева принесе во святилище святителю, * простер же
руце, Симеон прият Сего, радуясь, * и возопи: ныне отпущаеши раба Твоего,
Владыко, * по глаголу Твоему, с миром, Господи.

НА ЛИТУРГИИ:

Блаженны от канона праздника песнь 1-я, и святого песнь 6-я.

Возопил еси, внегда видел еси Господа, Симеоне, яко обещался еси: ныне раба Твоего, Спасе, отпусти, во аде сущим всем Твое Божественное возвещающа воплощение.

Украсился еси и Моисея светлейший был еси, на руки добротойю Краснаго приим, Симеоне старче, нас ради по нам Младенца бывша.

Слава: **Вод** тя исполнена Божественных суща и во адова дольная места спешша, видевши тамо сущии узницы, Симеоне, Божественныя росы исполнишася.

И ныне: Богородичен: **Уловити** мя всегда ищет вселукавый, но того мя сетей исхити, Владычице, и Божественным кровом крил Твоих цела соблюди.

Тропарь праздника, глас 1:

Радуйся, Благодатная Богородице Дево, * из Тебе бо возсия Солнце Правды, Христос, Бог наш, * просвещаяй сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение.

Кондак святого Симеона, глас 4.

Старец днесь отрешитися от юз моляшеся * сего жития тленного, * Христа восприят на руки, * Зиждителя и Господа.

Прокимен, праздника, и святого, глас 7: Возвеселится праведник о Господе * и уповае на Него.

Стих: Услыши, Боже, глас мой, внегда молити ми ся к Тебе.

Апостол к Евреям, зачало 321 от полу.

Братие, Христос, пришед Архиерей грядущих благ, большею и совершеннейшею скиниею, нерукотворенною, сиречь, не сея твари, ни кровию козлею, ни тельчею, но Своею Кровию, вниде единою во святая, вечное искупление обретый. Аще бо кровь козлия и тельчая, и пепел юнчий кропящий осквернения, освящает к плотней чистоте, кольми паче Кровь Христова, Иже Духом Святым Себе принесе непорочна Богу, очистит совесть нашу от мертвых дел, во еже послужити нам Богу живу и истинну.

Аллилуия, глас 6: Свет возсия праведнику, * и правым сердцем веселие.

Евангелие от Луки, зачало 8.

Во время оно, бе человек во Иерусалиме, емуже имя Симеон. И человек сей праведен и благочестив, чая утехы Израилевы, и Дух бе Свят в нем. И бе ему обещанно Духом Святым, не видети смерти, прежде даже не видит Христа Господня. И прииде Духом в церковь. И егда введоста родителя Отроча Иисуса, сотворити има по обычаю законному о Нем, и той приемь Его на руку своею, и благослови Бога, и рече: ныне отпускаеши раба Твоего, Владыко, по глаголу Твоему, с миром, яко видесте очи мои спасение Твое, еже еси уготовал пред лицом всех людей, свет во откровение языком, и славу людей Твоих Израиля. И бе Иосиф и Мати Его чудящася о глаголемых о Нем. И благослови я Симеон, и рече к Марии Матери Его:

се лежит Сей на падение и на востание многим во Израили, и в знамение пререкаемо, и Тебе же Самой душу пройдет оружие, яко да открыются от многих сердец помышления. И бе Анна пророчица, дщи Фануилева, от колена Асирова, сия заматоревши во днех мнозех, живши с мужем седмь лет от девства своего, и та вдова яко лет осмьдесят и четыре, яже не отхождаше от церкви, постом и молитвами служащи день и ноць. И та в той час приставши исповедашеся Господеви и глаголаше о Нем всем чающым избавления во Иерусалиме.

Причастен праздника и святого: **В** память вечную: